

Segun sra. Anne E Witsenburg

Vision di e fundacion Monumementen Fonds ta hopi hancha

ORANJESTAD - Directora di fundacion Monumementen Fonds, sra. Anne E Witsenburg a declara na Bon Dia Aruba cu e vision cu e fundacion aki ta protege edificionan monumental so ta bay cambia.

“Nos vision ta hopi hancha”, asina sra. Anne E Witsenburg a bisa.

Herencia cultural

E ta bisa cu nan ta considera herencia cultural material riba diferente tereno entre nan nos monumentonan, hallazgo arkeologico riba tera y submarino, bukinan bieu, artefactonan bieu y tambe tin e parti inmaterial tambe manera nos historia, musica, gastronomia tipico, danza, etc...

“Nos ta considera tur cos herencia cultural cu no por biba separa”, el a bisa.

E ta recorda cu cada monumento cu nan ta rescata su

berdadero balor ta e historia tras di dje. “Sin historia ta beton, palo, glas y nada mas...”, el a bisa.

E ta convenci como directora di Monumenten Fonds cu nan tin cu protege tur nos herencia cultural material y inmaterial.

Herencia inmaterial

E ta haya cu kisas actualmente e enfoka ta wordo poni riba edificio monumental ya cu ta algo hopi visibel. Mientras cu si bo ta inverti pa haci un investigacion pa ehempel riba tambu, cumin-da crioyo, e ta menos visibel.

Sra. Anne

E Witsenburg a declara cu nan tin hopi partner cu nan ta traha hunto entre otro Museo Historico, Santa Rosa, seccion di arkeologia cu lo habri pronto cuater sitio arkeologico y splica publico riba e balor di e descubrimientonan aki. □

